

# Superstishon

Un otro año ta nèt dilanti porta. Kiko e año nobo lo trese? Dios so sa! Maske e año nobo ta kubrí ku un mantel di skuridat, esei no ta kita ku hopi hende ta apliká tur klase di superstishon en búskeda di éksito pa e año binidero.

Superstishon ta afektá bida di hopi hende kada dia di año. Ma ora año ta bòltu, kisas nos superstishonnan ta mas bisto. Hende ta laba kas i baña ku “7 Sorto” bisti paña limpi, sensia kada huki di kas keriede ku esaki lo garantisá suerte pa e próksimo año. Nan ta saka un bòshi di sèn pa kumpra tapeit, pagara, èts., sperando ku esei lo kore ku fuku i trese prosperidat pa nan kas òf negoshi. Despues di tiro, paga bon tino ken ta drenta porta di kas promé; e por afektá bo suerte den año nobo.

E práktikanan di bispu di año ta un síntoma so di e malesa di superstishon ku ta infektá hopi hende bida largu. Ora un señora ta na estado e ta avisá pa no sinta banda di porta òf ku pia krusá. E no mester hunga ku kachó pa e beibi no nase ku kara di kachó.

Despues ku e beibi nase, mester tene kuenta ku tur klase di superstishon. Maske kon bunita e beibi por ta, nunka por ekspresá esei; mester bisa ku e ta “mahos!” Mester blous e yu pa proteh’é kontra oyada. Tin superstishon pa sigurá ku e yu lo desaroyá bon. Algun hende ta mara sinta pretu na su garganta pa e garganta bira duru. Otronan ta mara hilu na su pia pa garantisá ku e lo siña kana. Tin hende ku no ta kòrta su kabei, pa no pèrhudik’é di siña papia.

Superstishon ta afektá kon hende ta biba. No mester kap un palu bieu den un solo biaha, òf kabes di kas lo muri. Si un pèrsona su presensia ta indeseá na bo kas, pone un basora para kabes ariba, tira salu riba dje, i e bishitante lo bai. Si bo no ke p’e bolbe, tira shinishi ku salu su tras. Si bo tin algu ku hende por antohá riba dje, pone un “kontra” pa evitá oyada. Hopi hende ta mara un sinta kòrà na palu di fruta, pa bista di hende ku wowo skèrpi no kai dirèkt riba e palu. Otronan ta bisti un “kontra” tur ora. Si bo yega kas despues di 12 ‘or di anochi, drenta ku lomba, pa evitá ku spiritu malu ta drenta bo tras.

I tin hopi kreensia relashoná ku morto. Ta bisá ku spiritu di un hende ta kuminsá kana 6 siman promé ku su morto. Yunan di saku tin abilidad di mira e spiritu, i otro hende por mir’é si nan ta para na man robes di e yu di saku. Si bo mira un barbulèt pretu òf shinishi den serkania di bo kas, bo por sa ku un famia ta bai muri. No sinta ku man krusá riba kabes pa no mata bo mama.

Hende ku ta bai tras di e superstishonnan aki, ta biba komo katibu. Kasi nan no por move sin tene kuenta ku “Shon Super-stishon.” Hasi esaki, no hasi esei, pa evitá spiritu malu, fuku, mal suerte, morto, i hopi otro maldishon.

No ta straño ku miones di hende na otro pais ku ni sikiera a tende di nos superstishonnan, i pues no ta tene kuenta ku nan, tòg ta biba trankil, sin miedu di fuku? No ta straño ku hopi hende na nos islanan ku sa di e superstishonnan ma no ta paga tino na nan, tin e mésun “suerte” ku hende superstisioso? No ta straño ku nèt esnan ku ta tan kouteloso pa tene kuenta ku kada superstishon, ta nèt esnan ku ta biba mas intrankil, i mas yen di miedu?

Beibel ta bisa “*..si e Yu (Hesus) hasi boso liber, di bèrdat boso lo ta liber* (Juan 8:36). Bo por eksperensia e libertat aki ora bo ta rekonosé ku bo ta un pekadador, meresiendo kastigu pa bo piká, i bo ta pidi Kristo salbá bo. E ora ei bo ta bira un yu di Dios i bo por ta sigur di Dios Su protekshon. “*..mi ta konvensé ku ni morto, ni bida, ni angelnan, ni prinsipadonan,, ni kosnan presente, ni kosnan futuro*(den e año nos dilanti)...*ni ningun otro kos kreá, lo por separá nos for di amor di Dios ku ta den Kristo Hesus, nos Señor*” (Romanonan 8:38-39).

Un otro año ta nèt dilanti porta! No laga miedu sigui dominá bo. Bo por drenta un año nobo liber di miedu i superstishon.